



U Komemorativnom centru u Tuzli danas je izvršena identifikacija još sedam žrtava iz Vlasenice, koje su u tom gradu ubijene 1992. godine u periodu agresije i etničkog čišćenja nesrpskog stanovništva. Identitet žrtava je utvrđen DNK analizom, a prema izjavama svjedoka i srodnika, riječ je o Vlaseničanima koji su 1992. godine ostali u svom gradu, gdje su uhapšeni, zatočeni, a potom strijeljani samo zato što su Bošnjaci.

Identifikovani su Arifa (Rasim) Beširević, rođena 24. decembra 1950. u mjestu Plane u opštini Han Pijesak. Ona je bila nastanjena u Nurićima u opštini Vlasenica, a nestala u mjestu Štedrić 10. septembra ratne 1992. Njeni posmrtni ostaci ekshumirani su na lokalitetu Štedrić u opštini Milići 29. aprila 2002., Šukrija (Ibro) Efendić, rođen 1. januara 1951. u Vlasenici, gdje je nestao 13. jula 1992. Njegovi skeletni ostaci pokupljeni su s površine terena u mjestu Pelemiši u opštini Šekovići 21. maja 2007.

Identifikovan je i Emin (Ahmet) Gobeljić, rođen 10. marta 1956. u mjestu Gobelje u vlaseničkoj opštini, nestao 1. maja 1992. u Vlasenici a ekshumiran iz masovne grobnice Pelemiši u opštini Šekovići u augustu 2004., Sead (Adil) Mehanović, rođen 21. aprila 1958. u Vlasenici, gdje je nestao 20. maja 1992. Njegovi skeletni ostaci pokupljeni su također s površine terena na lokaciji Pelemiši (Šekovići) 21. maja 2007., Sulejman (Sulejmen) Pezić, rođen 28. juna 1939. u mjestu Drum u vlaseničkoj opštini, nestao 6. juna 1992. u Vlasenici. I njegovi posmrtni ostaci nađeni su na površini terena na lokaciji Pelemiši u šekovičkoj opštini 21. maja 2007.

Identifikovani su i Safet (Sejfo) Saračević, rođen 6. jula 1943. u Vlasenici, a nestao 10. augusta 1992. u mjestu Pelemiši, općina Kladanj, ekshumiran iz masovne grobnice na lokaciji Pelemiši u opštini Šekovići u augustu 2004. i Sejfo (Rešid) Telalović, rođen 2. augusta 1952. u Vlasenici, gdje je i nestao 30. juna 1992. Skeletni ostaci pokupljeni su s površine terena 21. maja 2007. na lokalitetu Pelemiši u opštini Šekovići.

Specijalista sudske medicine dr. Vedo Tuco, koji radi pri Međunarodnoj komisiji za traženje nestalih (ICMP) u Tuzli, u izjavi za Tuzlarije iznio je rezultate analize izvještaja o identifikaciji posmrtnih ostataka ubijenih Vlaseničana.

Identifikovano još 7 žrtava etničkog čišćenja iz Vlasenice

Autor S.P. Tuzlarije

Petak, 16 Travanj 2010 19:07 -

Video: http://www.youtube.com/watch?v=hzHwdDaO1CM&feature=player_embedded

O tragediji porodice Efendić ispričala nam je Ajša Efendić koja je danas došla da potvrdi identifikaciju kostiju svog muža.

Video: http://www.youtube.com/watch?v=aWnkyHp__e0&feature=player_embedded

Posljednjih dana je ubrzan proces identifikacija Vlaseničana, a u toku je i uređenje šehidskog mezarja Rakita u Vlasenici, na kome će 24. aprila biti klanjana dženaza žrtvama etničkog čišćenja. Dosad su na nekoliko kolektivnih dženaza, na šehidskom mezarju Rakita u Vlasenici, ukopane 232 vlaseničke žrtve. Procjenjuje se da je tokom agresije ubijeno preko 2.600 Vlaseničana, a za mnogim tijelima se i dan danas traga.

S.P.